

# Penduduk, pelajar bersaing cari lokan

SH 26/06/08 pg-T4

Pertandingan itu diadakan bagi mengetengahkan aktiviti yang sinonim dengan masyarakat di kampung itu kepada pelajar UMT yang kebanyakannya tinggal di kawasan bandar.

■ AZURA MOHAMAD

**KUBANG IKAN** - Penduduk Kampung Kubang Ikan dan pelajar Universiti Malaysia Terengganu (UMT) menyertai pertandingan mencari lokan sempena Program Keluarga Angkat Rakan Muda Desa Wawasan yang diadakan di kampung berkenaan.

Setiausaha Gerakan Belia 4B Malaysia Cawangan Kubang Ikan, Mohd Yusmarizal Yusof berkata, pertandingan itu diadakan bagi mengetengahkan aktiviti yang sinonim dengan masyarakat di kampung itu kepada pelajar UMT yang kebanyakannya tinggal di kawasan bandar.

"Kebanyakan pelajar yang terlibat dengan program ini merupakan mereka yang berasal dari bandar, jadi sudah pasti mereka tidak pernah me-



Sebahagian penduduk dan pelajar UMT mencari lokan di kawasan lopak Kampung Kubang Ikan.

lihat lokan di tempat masing-masing.

"Aktiviti atau pertandingan ini diketengahkan agar pelajar yang terlibat dapat merasai suasana sebenar kehidupan masyarakat di kampung.

"Selain itu, program ini juga adalah untuk melahirkan semangat kerjasama dan seterusnya menjalinkan hubungan antara penduduk kampung dan masyarakat setempat," katanya kepada **Sinar Harian**

ketika ditemui pada program tersebut.

Menurut Yusmarizal, aktiviti mencari lokan dijadikan sebagai pertandingan supaya wujud kerjasama dan semangat bersaing dalam kalangan pelajar.

"Dengan adanya pendekatan ini, peserta yang terlibat sama ada pelajar atau penduduk kampung sendiri akan lebih bersemangat mencari lokan dan di sini mereka dapat

rasai kehidupan masyarakat kampung yang terpaksa melalui serba kepayahan untuk mendapatkan sesuatu," katanya.

Beliau berkata, untuk mendapatkan lokan mereka terpaksa mencari (mengali tanah yang berselut) dalam lopak berwarna hitam. Secara tidak langsung mereka dapat mengetahui budaya hidup masyarakat setempat yang begitu asing buat mereka.